

Luxia Arrabiosa

Luxia fiat una panetera stimada, aici bona a inforrai e coi chi totus is chi biviant in sa bidda cosa sua disigiànt su chi issa faiat. In medas lompiant a che issa po ddi pediri unu pagu de totu cussu de bonu chi coiat, ma issa, susunca e presùmia, non ndi donaiat a nemos, mancu si ndi teniant abisòngiu. Una dii Deus, chi iat intèndiu custu contu, iat detzìdu de ddi donai una possibilidadi po amostai chi a sutu a sutu teniat unu coru bonu. Duncas fiat andau a domu sua bistiu de pedidori e candu dd'iat pediu unu arrogu de pani issa si fiat arrefudara, fendi inchietai a Deus chi dd'iat mudada in una perda.

Oindi Luxia abarrat cuada me is padentis cun una pàlia po inforrai abetendi chi calincunu s'acostit po ddi donai unu corpu a conca. Duncas, chi ses in mesu a unu padenti e intendis unu fragu bonu de pani, stesiadì-ndi!

S'amutadori

Candu cancunu dormit a bortas podit acuntessi chi no arrenescit a si movi o a fueddai, bolit nai chi ddoi at s'Amutadori. Su nòmini de custu duendu arribat de su verbu “amuntai” chi bolit nai “fai unu bisu lègiu”.

Difatis s'Amutadori arribat candu ses dormendi e ti ndi acatas chi est arribau poita ti siddat in su letu e non ti podis movi ni tzerriai ca issu, setzendisì in piturras e aguantendidì is bratzus, si papat totus is spramas lègias chi ses bisendi!

Po su chi nant is pagus chi dd'ant biu sa cara sua mudat sèmpiri, a bortas unu tiàuleddu, a bortas unu duendixeddu malinniu, àteras bortas unu pegas chi po nci ddu bogai si depit arresai custu brebu sena de aberri is ogus:

gruxi de Santu Valentinu
Cantu est dereta est fini
Cantu est fini est dereta
S'amutadori
Si ndi andit in astulas
Scuru che marea
Scuru che in buca
Cambas de stupa
Peis de ortigu
Manus de folla de figu
E ogus de pirastu

Is janas

Medas annus a oi, in totu sa Sardinnia, biviat custa genia de fèminas piticas connotas po s'arti insoru de tessi su linu cun telàrgius de oru. Teniant che a domu is nuraxis, is minieras, is grutas, is dolmen e is fàabricus abandonaus me is montis o in su sartu, mancai si preferriant is grutixeddas chi nci funt me is costas de is cucurreddus chi si nant, po custu, domus de janas.

De carena minuda ma bellas meda e elegantis, fiant bregungiosas e passànt totu sa dii a tessi in s'umbra ca su soli ddas podiat bociri abruxendiddas.

Oindi, a dolu mannu, no s'agatant prus in Sardinnia po nexi de s'asurimini de is òminis chi ant pesau domus e segau matas me is padentis, mancai si calincunu narat de ddas ai bias a de noti in logus spèrdius in mesu a is montis.

E tui biu nd'as?

Su Gatu marrudu

Su gatu marrudu fiat unu gatu chi biviat in su padenti e papaiat sa llinua de is pipius scinitzosus